



SAUNOAGA AUTU A LE AFIOGA I LE SUI PALEMIA,
HON. TUALA TEVAGA IOSEFO PONIFASIO
O SAMOA I LE TOE FAAULUFALEINA MAI I SAMOA
O LE VAALELE A LE SAMOA AIRWAYS O LE 5W-FAW
ASO FARAILE, 14 MATI, 2025 ILE 6:00PM

Susu lau Susuga i le Ta'ita'i ole sauniga Rev. Eric Mulitalo
Afifio afioga i Minisita o le Kapeneta
Afifio le Afioga i le Ta'ita'ifono ma le Komiti Faatonu a le Samoa Airways
Susuga Fa'auluuluga o Pisinisi Tuto'atasi, Matagaluega
ma Fa'alapotopotoga a le Malo
Alalata'i le paia ma le mamalu ua aofia i le asõ

O Samoa e le tau faailo ona tulaga faalupe I ona sa ma faiga ua taoto a'o se alao'o.
O le a ou le toe oo iai, ona o paia lava mai le vavau e oo ile faavavau.

Faafetai ile susuga ile Faafeagaiga Taulagi mo talosaga ua molia, ina ia faatasi
mai le Atua soifua i lo tatou faamoemoe I lenei afiafi.

O le asõ ua tatou potopoto fa'atasi ai e molimauina le toe taunuu mai ma le
saogalemu o se tasi o va'alele a le tatou Kamupani Vaalele o le Samoa Airways,
na auina atu i Kanata mo le toe fa'aleleia ma fa'afouina o lona tino atoa ma totoga
uma. O se fa'aailoga lea o le naunautaiga o le kamupani ina ia mautinoa le fa'aauau
pea o le lelei male saogalemu o femalaga'aiga i luga o le ea ma fa'aleleia atili le
tulaga o feso'otaiga ma isi atunu'u.

I le masina o luni o le tausaga ua tuana'i na galulue fa'atasi ai le Samoa Airways
ma le Unity Aviation Canada o Kanata mo le fa'atinoina o lenei galuega tele. O le
ulua'i fuafuaga sa i ai e 7 masina e fa'atino ai le galuega i se tau e \$7 miliona Tala
Samoa. Ae pei ona i ai i so'o se fuafuaga tele ma faigata, e le tutusa le fuafuaga
ma le taunu'uga na o'o i ai. O le taimi atoa sa fa'atino ai le galuega e 9 masina i le
tau e \$10 miliona Tala Samoa, O se si'itaga lea e 28% mai le taimi na ulua'i
fuafuaina e fa'atino ai ma le 43% o le tupe na ulua'i fuafuaina e faatupe ai.

E lua mafua'aga autu ua eseese ai le ulua'i fuafuaga sa i ai ma le taunu'uga na taunu'u i ai. Ina ua taunu'u le va'a i Kanata ma faia ai loa ulua'i su'esu'ega i le tulaga sa i ai le tino ma totoga o le va'a, o lea na maua ai, e tele nisi totoga fou e mana'omia ma tele se isi taimi fa'aopopo e mana'omia. E ui lava la i le taimi ma le tau fa'aopopo na iloa o le a o'o i ai, ae na talia lava ona o le fa'amoemoe ia fa'afouina ma fa'aleleia atoa le va'a i le tulaga lelei e tatau ona i ai.

Ou te fiafia tele e fa'aailoa atu, o le fa'atupeina o lenei galuega tele na fa'atino lava i tupe maua a le kamupani e aunoa ma se aitalafu.

E tele ni fa'amanuiaga mo le tatou atunu'u o le a maua mai i lenei galuega tele. E le gata o le a fa'aleleia atili ai le lagolago i pisinisi tulisi, fefa'atauaiga ma le fa'afaigaluegaina o puna'oa, ae o le a fa'apea foi ona fesoasoani i le fa'aleleia atili o le saogalemu i femalagaiga i le ea. O se fuava'a e lelei ona fa'afoe ma pulea o le a si'itia ai lona tulaga ta'uleleia, ma o le a fa'apea ona si'itia ai fo'i ma le faatuputupulaia o pisinisi tulisi, ma fefa'atauaiga mai maketi i fafo.

Ae le gata i lea, o lenei galuega o le a fa'alaua'iteleina ai le tomai ma le poto masani i galuega tau va'alele sivili ma fa'amalosia ai o tatou tagata e si'itia ai latou tautua fa'atusatusa ma tulaga ua ausia fa'avaomalo.

Mo le aga'i atu i le lumana'i, o le a fa'aleleia ma fa'afouina e le Samoa Airways isi ana va'alele e 2 i le tulaga na fa'aleleia ai le vaalele lea o lo'o tatou molimauina i le aso. E tasi i le fa'ai'uga o lenei tausaga ma le lona tolu i le tausaga fou.

E avea ai a'u ma Sui o le Malo o Samoa e momoli atu ai le agaga fa'afetai tele i le Samoa Airways mo le agaga naunau e fa'aleleia ma fa'afou ana va'alele mo le saogalemu ma le puipuia o femalagaiga i le ea, fa'apea ma le Unity Aviation Canada mo le latou tomai fa'apitoa e fa'atino ai le galuega mana'omia e pei ona fuafuaina. O nei galuega e fa'amautinoa ai le fa'aauau pea o le tulaga lelei o feso'otaiga i le va o Samoa ma le lalolagi atoa i le lumana'i.

O lo ua taoto foi fuafuaga ale tatou malo, e lagolago pea ile tatou Kamupani vaalele ale Samoa Airways I nisi o ana fuafuaga ile lumana'i, mo le manuia lautele o tagata Samoa.

Ia faamanuia mai le Atua I lo outou faamoemoe, aemaise Samoa mo sona manuia mo a taeao.

Faafetai, soifua ma ia manuia.